

ADMINISTRACIÓN LOCAL

MUNICIPAL

FERROL

Cultura

Bases que rexerán a convocatoria dos premios de investigación González Llanos, Concepción Arenal, Enxeñeiro Comerma, Antonio Usero e Ángeles Alvariño

EDUCACIÓN E UNIVERSIDADE

Anuncio das bases que rexerán a convocatoria dos Premios de investigación González Llanos, Concepción Arenal, Enxeñeiro Comerma, Antonio Usero e Ángeles Alvariño.

Premios de Investigación do Concello de Ferrol

O Concello de Ferrol convoca os premios de investigación González Llanos, Concepción Arenal, Enxeñeiro Comerma, Antonio Usero e Ángeles Alvariño.

BASES

PRIMEIRA

Estes premios teñen como finalidade apoiar e impulsar os labores de investigación realizados nalgún dos cinco ámbitos universitarios cos que se relacionan.

Poderanse relacionar xa sexa desde un enfoque estritamente teórico, a partir da análise de experiencias/feitos concretas/os ou como proxectos de futuro, podendo polo tanto ter unha perspectiva histórica, de presente ou como proxección de futuro.

Os premios serán adxudicados a traballos de investigación relacionados e pertencentes aos referidos ámbitos, tal e como a continuación se detalla:

- Premio de investigación Ángeles Alvariño, referido ao ámbito das Ciencias e ás titulacións universitarias que nel se inclúen.
- Premio de investigación González Llanos, referido ao ámbito da Enxeñería e da Arquitectura e ás titulacións universitarias que nel se inclúen.
- Premio de investigación Concepción Arenal, referido ao ámbito das Ciencias Sociais e Xurídicas e ás titulacións universitarias que nel se inclúen.
- Premio de investigación Enxeñeiro Comerma, referido ao ámbito das Artes e das Humanidades e ás titulacións universitarias que nel se inclúen.
- Premio de investigación Antonio Usero, referido ao ámbito das Ciencias da Saúde e ás titulacións universitarias que nel se inclúen.

SEGUNDA

A convocatoria dos premios terá carácter bianual:

Nos anos pares serán convocados os premios de investigación Ángeles Alvariño e González Llanos.

Nos anos impares serán convocados os premios de investigación Concepción Arenal, Enxeñeiro Comerma e Antonio Usero.

TERCEIRA

Poderán optar a estes premios e con independencia da súa nacionalidade:

Persoas de xeito individual: con perfil profesional ou con perfil investigador.

Equipos ou grupos multiprofesionais que poden estar formados só por profesionais, só por investigadoras/es ou ben por ambos (profesionais e investigadoras/es)

CUARTA

Cada edición de cada premio estará dotada con 10.000 €/premio.

A esta cantidade aplicaráselle as retencións a que houbese lugar en función da normativa tributaria vixente.

QUINTA

As solicitudes poderán presentarse desde o día seguinte ao da publicación do extracto da convocatoria destes premios no Boletín Oficial da Provincia da Coruña ata o 28 de setembro de 2018 a través do Rexistro Xeral do Concello de Ferrol ou en calquera dos lugares aos que se refire o art. 16.4 da Lei 39/2015 de outubro, de procedemento administrativo común das administracións públicas.

Enderezo postal para os envíos ao Concello Ferrol:

Concellería de Educación e Universidade Pazo Municipal

Praza de Armas, s/n

15402-FERROL

De cada traballo presentaranse:

a) Cinco exemplares do traballo completo en soporte papel, en formato PDF, dun máximo de 100 páxinas e unha versión en soporte informático (CD ou Pen drive) onde o tamaño do arquivo sexa inferior a 5MB (sen datos identificativos de autoría)

b) Unha síntese do mesmo de non máis de 4 páxinas en formato PDF, con letra Arial 12, interlineado 1'5 en papel Din A-4 (sen datos identificativos de autoría)

c) Co fin de preservar o anonimato das/os candidatas/os, os traballos deberán ser presentados baixo o sistema de plica, motivo polo que estes serán enviados xunto cun sobre á parte en cuxo exterior conste:

Premios de Investigación do Concello de Ferrol

Premio ao que concorre

Título do traballo e ámbito de coñecemento ao que se adscribe

No seu interior e en pechado, incluírá os seguintes datos e documentos:

a) Datos persoais do/a autor/a de ser unipersoal ou de todas/as os/as autores/as de ser un equipo/grupo de autoras/es (enderezo postal completo, número de teléfono e correo electrónico)

b) Fotocopia do/s DNI/NIE

c) Curriculum Vitae (da autora ou autor ou dos membros do equipo/grupo)

d) Declaración xurada de que o traballo de investigación presentado non foi premiado.

e) Para o suposto 2 da cláusula terceira, identificación da persoa que como membro do equipo actuará como interlocutor/a diante do Concello de Ferrol.

Tanto a actuación do xurado como todos os demais aspectos do procedemento esgotarán a vía administrativa.

SEXTA

Requisitos dos traballos de investigación para concorrer a estes premios:

- A estrutura dos traballos contemplará polo menos os seguintes apartados: obxectivos, metodoloxía, resultados, aplicabilidade, transferencia, conclusións, xustificación do interese da investigación e fontes bibliográficas e documentais.

- Deberán estar redactados en calquera das linguas que o Estatuto de Autonomía de Galicia sinala como oficiais no territorio desta comunidade autónoma (galego e castelán).

- Deberán ser orixinais e innovadores e non ter obtido con anterioridade ningún outro premio.

Calquera traballo que amose a súa autoría en calquera dos documentos presentados, quedará excluído para a concesión do premio ao que concorra.

SÉTIMA

O xurado dos premios estará formado polos seguintes membros:

-O/a alcalde/esa de Ferrol ou a persoa en quen delegue, que como presidente/a terá voto de calidade.

-Un/ha especialista de recoñecido prestixio no ámbito da investigación correspondente.

-Tres investigadoras/es universitarias/os propostas/os pola Universidade da Coruña e pertencentes ao ámbito de investigación que en cada premio corresponda.

- Un/ha funcionario/a do Concello de Ferrol que actuará como secretario/a, con voz mais sen voto.

Cada premio/edición terá o seu propio xurado en relación co ámbito ao que se refira o premio, agás no caso do/a presidente/a e do/a secretario/a que poderán ser as mesmas persoas.

A composición do xurado será paritaria e darase a coñecer, con anterioridade a súa primeira reunión, no taboleiro e na páxina web do Concello de Ferrol

(www.ferrol.gal/premiosdeinvestigacionconcellodeferrol), co fin de que se poidan interpoñer, no seu caso, os recursos legais pertinentes.

A proposta do xurado publicarase no último trimestre do ano de cada edición dos premios na páxina web do Concello de Ferrol (www.ferrol.gal/premiosdeinvestigacionconcellodeferrol)

O xurado actuará en pleno e será necesaria a asistencia da maioría simple dos seus membros. Para os efectos da validez da súa constitución aplicarase o disposto no art. 17 Lei 40/2015, de 1 de outubro, de réxime xurídico do sector público.

O xurado presentaralle a súa proposta ao/á Alcalde/esa-Presidente/a da Corporación Municipal de Ferrol, que é o órgano competente para conceder estes premios.

OITAVA

O xurado designado para a valoración e a selección dos traballos presentados valorará estes tendo en conta:

-A calidade e o rigor científico: 45%

-Innovación, interese, contribución ao coñecemento do patrimonio cultural ou aplicabilidade dos traballos: 45%

-A libre criterio do xurado e por decisión da maioría dos seus membros: 10%

Calquera premio poderá ser declarado deserto, sempre e cando o xurado considere que os traballos de investigación presentados non acaden os requisitos esixidos ou os niveis suficientes.

Os traballos presentados non serán devoltos. Posteriormente e no mesmo ano de cada convocatoria, os traballos non premiados serán destruídos.

NOVENA

A Universidade da Coruña colaborará co Concello de Ferrol no desenvolvemento destes premios.

DÉCIMA

O feito de se presentar a calquera destes premios supón a aceptación das presentes bases e que se cumpren os requisitos mencionados.

UNDÉCIMA

Publicación/edición dos traballos premiados:

Os traballos de investigación premiados poderán ser editados e publicados como publicación de carácter non venal polo Concello de Ferrol en soporte papel, en soporte dixital ou en ambos e a/s persoa/s ou grupo/s candidatos/as aos premios adquirirán de antemán o compromiso de adaptar a documentación presentada para o premio ao formato a editar, sen esixir este/s outras contraprestacións por parte do Concello de Ferrol que non sexa a propiedade intelectual á que teñen dereito e á entrega do 10% de exemplares sempre que se edite en soporte papel (libro) ou en soporte dixital (CD).

Ferrol, 27 de xullo de 2018.

O concelleiro delegado da Área de Cultura e Educación, Universidade, Deportes, Turismo e Festas,

Jesús Basterrechea López

2018/5724